

Апрель апрель

Дінге де жанашырлық керек

Кешегі санамызға қылау түсіп, бұлыңғыр бұлт торлаған күндерде Ленинді “күн көсем” деп, құдай дәрежесіне көтергеніміз еш жасырын емес. Сондықтан, алдан жарқын күндерді күтсек те, өміріміздегі жат қылықтардың шырмауынан толық арылып болған жоқпыз. Ең бастысы, біздің қоғамымызда имандылық құндылықтар жетіспейтін сияқты. Әсіресе, замандастарымыздың рухани жағынан жұтандануы алаңдатады.

Меніңше, адамдар санасында олқы түсіп, жетіспей жатқан кемшіліктердің орнын толтыратын бір нәрсе, ол—дін болып табылады. Ал, бүгінгі үгіт-насихат арнасында зиялы қауым өкілдерінің дінді уағыздаудағы рөлі әлі биіктей қойған жоқ.

Кешегі дінсіз қоғам орнатамыз деген заманның өзінде имам, қалпе, молдалар халық арасында өз уағыздарын жүргізді ғой. Жұртшылық та діни ғұрыптарды жасырын болса да орындады. Үлкендеріміз тығылып намазын оқып, оразасын ұстады. Айт кезінде құрбандық шалды. Тек, жас ұрпағымыздың осының бәріне сырттай қатынасқанымен, нағыз берік діни ұстанымы болмағанын да білеміз.

Қазір олар өсіп, алды қариялыққа, көбі орта жасқа жетіп отыр. Өмір тәжірибесі кеңестік кезеңде қалыптасып, кешегі күндері келешекке деген нық сенімі шайқалып, сыр бергендіктен жаңа заманда алдарында түсініксіз сұрақтар баршылық.

Шынын айтсақ, сол алдыңғы толқын аға буын өкілдерінің бір бөлігі намаз оқып, қажылыққа барып, ислам қағидаларынан білімін толықтырып, қоғамымыздың ұлы көшіне ілігіп, әжептәуір белсенділік көрсетіп жүр. Олар бойларын жаман әдеттерден аулақ салып, әділдікке, адамгершілікке, шыншылдыққа ұмтылуда.

Ендеше, осылай үлкендеріміз үлгі болуға жараса, жастарымыз олардың сондарынан ермей ме?! Қазақтың “Әкеге қарап ұл өсер, шешеге қарап қыз өсер” деген мақалы осы жағдайды бізге қанықтыра түседі. Яғни, жас мемлекетіміздегі оң өзгерістерді ескере отырып, әлі де болса халқымыздың, арасында мұсылмандық діни уағыздарды кеңінен тарату керектігі аңғарылады.

Негізінен осы бағыттағы жұмыс одан әрі жандануы тиіс шығар. Өйткені, халқымыздың көпшілігінде берік мұсылмандық көзқарас қалыптасып, имандылық терең бой жайды деп айту қиын. Меніңше, елімізді көркейтіп, халқымызды жаңа заманға сай біріктіреміз, рухани жағынан дамытамыз десек, ең алдымен дінімізді қадірлейік. Сондықтан, Елбасымыз Нұрсұлтан Назарбаевтың: “Біз тегіміз түрік, дініміз ислам екенін ұмытпауымыз керек. Ол үшін қасиетті кітап Құран кәрімді насихаттауымыз керек”—деген даналық сөзін бәріміз есте ұстасақ дейміз.

Сайлаубек БАЙБОЛОВ.

Астана қаласы.